

একক আলোচক: সুশান্ত কুমার দাস

সঞ্চালক: জামালউদ্দিন আহমেদ, সাধারণ সম্পাদক, বাংলাদেশ অর্থনীতি সমিতি

আয়োজক: বাংলাদেশ অর্থনীতি সমিতি

তারিখ: ১৪ আগস্ট ২০২১ তারিখ শনিবার বাংলাদেশ সময়: সন্ধ্যা ৭:১৫টা

গটভূমি

নজিরবিহীন মহামারি করোনাভাইরাসের দ্বিতীয়-তৃতীয় ঢেউয়ে আমাদের প্রিয় স্বদেশ আজ ভীষণভাবে বিপন্ন-অসহায়। পৃথিবীজুড়ে শুরু হয়েছে অর্থনৈতিক মহামন্দা। এরই সাথে অতিমারির অনিশ্চিত প্রতাপ। বৈশ্বিক এই মহা দুঃসময়ে বাংলাদেশ অর্থনীতি সমিতি খুঁজছেশোভন সমাজ, শোভন রাষ্ট্র, শোভন বিশ্বব্যবস্থা। আর সে জন্যই আয়োজন ভার্চুয়াল আলোচনা—“শোভন সমাজের সন্ধান”। এই আলোচনায়দেশ ও দেশের বাইরে থেকে Zoom, YouTube এবং Facebook-এ যাঁরা যোগ দিয়েছেন, তাঁদের সবাইকে আন্তরিক শুভেচ্ছা ও অভিনন্দন। ভার্চুয়াল পরিমণ্ডলের এই একক আলোচনায় বাংলাদেশ অর্থনীতি সমিতির লক্ষ্য ও উদ্দেশ্য হলো—“একটি শোভন সমাজ, শোভন সংস্কৃতি, শোভন জীবনবোধ, শোভন জীবনব্যবস্থা, শোভন অর্থনীতি, শোভন রাষ্ট্র বিনির্মাণেজ্ঞানভিত্তিক প্রভাবকের ভূমিকা পালন করা”।

এই আলোচনার মূল কেন্দ্রবিন্দু হচ্ছেদেশে-বিদেশে সাড়াজাগানো অধ্যাপক ড. আবুল বারকাত রচিত ৬০৩+lvi পৃষ্ঠাসংবলিতএকটি মৌলিক গ্রন্থ—“বড় পর্দায় সমাজ-অর্থনীতি-রাষ্ট্র: ভাইরাসের মহাবিপর্ষয় থেকে শোভন বাংলাদেশের সন্ধান”। অধ্যাপক ড. আবুল বারকাত বাংলাদেশ অর্থনীতি সমিতির তৃতীয় দফা নির্বাচিত সভাপতি। তাঁর দীর্ঘ চার দশকের জ্ঞানসাধনার ফসলএই গ্রন্থটিতে একটি স্বব্যখ্যায়িত বিস্তৃত মুখবন্ধসহ আছে ১২টি অধ্যায়। বড় দাগে এসব অধ্যায়ে আছে: ১. শোভন সমাজের তত্ত্বকাঠামো; ২. প্রচলিত মূলধারার অর্থনীতিশাস্ত্রের অপারগতা ও নতুন অর্থনীতিশাস্ত্রের যৌক্তিকতা; ৩. মুক্তিযুদ্ধের চেতনার রাজনৈতিক অর্থনীতি; ৪. ধনী-দরিদ্র শ্রেণিবৈষম্য ও অসমতা; ৫. ধর্মভিত্তিক সাম্প্রদায়িকতা, মৌলবাদ ও জঙ্গিবাদ; ৬. বিশ্বায়নের স্বরূপ; ৭. দুর্নীতি দুর্বৃত্তায়নের কাঠামোতে অর্থনৈতিক প্রবৃদ্ধির সীমানা প্রসঙ্গ; ৮. কভিড-১৯ এ ক্ষতির বিশ্লেষণ; ৯. শোভন সমাজ-শোভন অর্থনীতি বিনির্মাণের মডেল; ১০. সমাজ সমগ্রকের রাজনৈতিক অর্থনীতি; ১১. কেমন হওয়া উচিত শোভন সমাজ বিনির্মাণের জাতীয় বাজেট? এবং ১২. উপসংহার।

বাংলাদেশ অর্থনীতি সমিতি সম্প্রতি ঐতিহাসিক এই গবেষণাগ্রন্থটির বিভিন্ন অধ্যায় ও শিরোনামকে কেন্দ্র করে ধারাবাহিকভাবে ১৩ সিরিজের ওয়েবিনার সম্পন্ন করেছে। দীর্ঘ চার মাসের ওই আয়োজনে দেশ ও

বিদেশ থেকে আলোচক হিসেবে ছিলেন অর্ধশতাধিক অর্থনীতিবিদ, সমাজবিজ্ঞানী, আইন বিশারদ, ভাষাবিজ্ঞানী, প্রকৃতিবিজ্ঞানী, রাষ্ট্রবিজ্ঞানী, শিক্ষক, চিকিৎসক, রাজনীতিবিদ, মানবাধিকার বিশেষজ্ঞ, সুশীলসমাজ প্রতিনিধিসহ নানা শ্রেণি-পেশার ব্যক্তিত্ব। দেশ ও দেশের বাইরে থেকে Zoom, YouTube এবং Facebook-এ কয়েক সহস্রাধিক শ্রোতা-দর্শকও এতে অংশ নিয়েছিলেন। মননশীল জ্ঞানবিকাশের জন্য অত্যন্ত গুরুত্বপূর্ণ ওয়েবিনার সিরিজের জ্ঞানগর্ভ আলোচনায় দর্শক-শ্রোতাদের অনেকেই ছিলেন অতৃপ্ত। তাদের অনুরোধে অর্থনীতি সমিতি সমগ্র গ্রন্থের ওপর একক আলোচনার নতুন এই কার্যক্রমের সূচনা করেছে। ৩ পর্বভিত্তিক ৯০ মিনিটের এই আলোচনার প্রথম ৩০ মিনিট গ্রন্থের ওপর আলোচকের বিশ্লেষণী বক্তব্য। দ্বিতীয় ৩০ মিনিট আলোচকের কাছে শ্রোতা-দর্শকদের প্রশ্ন এবং শেষ ৩০ মিনিট আলোচকের উত্তর প্রদান পর্ব। আজ এই ওয়েবিনারে একক আলোচক হিসেবে আমাদের সঙ্গে আছেন অধ্যাপক ড. সুশান্ত কুমার দাস।

সংক্ষিপ্ত পরিচিতি

অধ্যাপক সুশান্ত কুমার দাস শাহজালাল বিজ্ঞান ও প্রযুক্তি বিশ্ববিদ্যালয়ের পদার্থবিজ্ঞান বিভাগের প্রাক্তন চেয়ারম্যান এবং ভূগোল বিভাগের প্রতিষ্ঠাতা চেয়ারম্যান। তিনি ১৯৭৩ সালে রাজশাহী বিশ্ববিদ্যালয় থেকে প্রথম শ্রেণিতে প্রথম হন। ২০০১ সালে পদার্থবিজ্ঞানে তিনি পিএইচডি করেন। ২০০৪-২০০৫ সময়কালের শাহজালাল বিজ্ঞান ও প্রযুক্তি বিশ্ববিদ্যালয়ের শিক্ষক সমিতির নির্বাচিত সভাপতি ছিলেন। তিনি বাংলাদেশ ফিজিক্যাল সোসাইটির আজীবন সদস্য। ১৯৬৯ এর গণ-অভ্যুত্থান এবং স্বাধীনতা যুদ্ধে সক্রিয়ভাবে অংশগ্রহণকারী অধ্যাপক ড. সুশান্ত কুমার দাস ১৯৯৭ সাল থেকে বাংলাদেশ ওয়ার্কাস পার্টির পলিটব্যুরোর সদস্য।

বক্তব্যের চুম্বক অংশ

- ✓ দেশের বুদ্ধিজীবীসহ বিশ্বব্যাপী অনেকের ধারণা, প্রবৃদ্ধি দিয়ে যে পথে বাংলাদেশ এগোচ্ছে, তাতে সংকট থেকে আমরা পরিত্রাণ পাব। কিন্তু ড. বারকাত এই গ্রন্থে দেখিয়েছেন—এই প্রবৃদ্ধি কত দূর হবে এবং এর সীমাবদ্ধতাই বা কী।
- ✓ ‘শোভন সমাজ ও জীবনব্যবস্থা’ পুঁজিবাদের বিকল্প।
- ✓ গ্রন্থে পুঁজিবাদের বিকল্প অন্বেষণ করে, নতুন পথের সন্ধান রয়েছে।
- ✓ গ্রন্থটি বাংলাদেশের আর্থসামাজিক অবস্থার গবেষণালব্ধ বিস্তৃত ব্যাখ্যা-বিশ্লেষণসমৃদ্ধ।
- ✓ বাংলাদেশের রাজনীতি-অর্থনীতি-সমাজ এবং বৃদ্ধিবৃদ্ধির সমস্ত ক্ষেত্র নিয়ে তিনি যে মূল্যায়ন করেছেন, তার সুদূরপ্রসারী প্রভাব আছে—তা কাজে দেবে।
- ✓ গোটা গবেষণাগ্রন্থের কাঠামো একদিকে যেমন তাত্ত্বিক মডেল এবং সেই সাথে অন্যদিকে আমাদের দেশের বাস্তবতায় সেই মডেল কীভাবে প্রয়োগ করা যাবে তার পথনির্দেশক।
- ✓ তিনি ভবিষ্যদ্বাণী করেছেন—যে বিশ্ব এখন আছে, মহামারির পরে সেই বিশ্ব আর থাকবে না। বিশ্ববাসী নতুন পৃথিবী দেখবে এবং নতুন পরিবর্তনের সামনে দাঁড়াবে—এ-ই হলো ড. বারকাতের গবেষণাগ্রন্থটির মূল নির্যাস।

- ✓ গ্রন্থকার শোভন জীবনের অশোভন প্রতিপক্ষ হিসেবে সাম্প্রদায়িকতা ও মৌলবাদকে চিহ্নিত করেছেন, যা বাংলাদেশের জন্য তাঁর একটি মৌলিক অবদান।
- ✓ সমাজব্যবস্থার ঐতিহাসিক ক্রমবিকাশের যে চিত্র গ্রন্থিত হয়েছে, তা অত্যন্ত সমৃদ্ধ।
- ✓ যাঁরা পুঁজিবাদকে শেষ কথা মনে করেন, অসাধারণ এই গ্রন্থ—“বড় পর্দায় সমাজ-অর্থনীতি-রাষ্ট্র: ভাইরাসের মহাবিপর্ষয় থেকে শোভন বাংলাদেশের সন্ধানে”—তাঁদের ভালো লাগবে না। পরিষ্কারভাবেই বলি, অনেক ক্ষেত্রে এই গ্রন্থটি তাঁদের রাতের ঘুম কেড়ে নেবে। এই গ্রন্থ সার্বিকভাবে সকল ধরনের পুঁজিবাদের মুখোশ উন্মোচন করেছে এবং তাকে প্রত্যাখ্যান করেছে।
- ✓ যাঁরা পুঁজিবাদের বিকল্প ভাবেন, তাঁদের এই বইয়ের বিষয়বস্তু এবং বক্তব্যকে অনুধাবন করতে হবে গভীরভাবে—নিজেদের প্রয়োজনে, তাতে একমত বা দ্বিমত যা-ই হোন না কেন।
- ✓ পুঁজিবাদের পক্ষের লোকেরা যাঁরা সমাজতন্ত্রের ঘোর বিরোধী, তাঁরা বলবেন—গ্রন্থকার ‘সমাজতন্ত্রের বিরুদ্ধে’, কারণ, তিনি ‘শোভন সমাজ’-এর কথা বলেছেন, সমাজতন্ত্রের নয়। কিন্তু তিনি যে পুঁজিবাদের বিরুদ্ধে বলেছেন—এটা বলবেন না।
- ✓ সমাজতন্ত্রের পক্ষে যাঁরা, তাঁরা বলবেন—‘তিনি সমাজতন্ত্রের পক্ষে বলেননি’। তার মানে, তিনি সমাজতন্ত্রের পক্ষে নন। কিন্তু তিনি যে পুঁজিবাদের বিকল্পের কথা বলেছেন, তা আমলেই নেবেন না হয়তো। দুরাত্মার ছলের অভাব নেই—সতর্কতা এখানেই।

সুশান্ত কুমার দাস-এর উপস্থাপনা

অর্থনীতি সমিতিতে ধন্যবাদ জানাই গুরুত্বপূর্ণ এই আয়োজনে আমাকে আমন্ত্রণ জানানোর জন্য। আমরা সবাই জানি শুধু বাংলাদেশ নয়, গোটা মানবজাতি আজ কোভিড-১৯ করোনা ভাইরাসের অতিমারির মহাবিপর্ষয়ের মধ্যে আছে। আজ যে গ্রন্থটি নিয়ে আমরা আলোচনা করব—“সমাজ-অর্থনীতি-রাষ্ট্র: ভাইরাসের মহাবিপর্ষয় থেকে শোভন বাংলাদেশের সন্ধানে”—গ্রন্থটির লেখক অধ্যাপক ড. আবুল বারকাত প্রতিথ্যশা অর্থনীতিবিদ-সমাজচিন্তক, শুধু বাংলাদেশ নয় আন্তর্জাতিক খ্যাতিসম্পন্ন। তাঁর সঙ্গে আমার পরিচয় চার দশকেরও বেশি সময় ধরে অর্থাৎ তাঁর বেড়ে ওঠা, ইন্সটলেবুটুয়াল ক্রমবিকাশ ও ধারার সঙ্গে আমি পরিচিত চার দশকেরও বেশি সময় ধরে। আমি পদার্থবিজ্ঞানের একজন ছাত্র, শিক্ষকও ছিলাম। কিন্তু রাজনৈতিক কর্মী হিসেবেই জীবনের অধিকাংশ সময় অতিবাহিত করেছি। এখনও আমি রাজনৈতিক কর্মী হিসেবে কাজ করছি। ফলে আমার আলোচনায় স্বাভাবিকভাবেই রাজনৈতিক বিষয়গুলো আসবে। বক্তব্যের শুরুতে বাংলাদেশের স্থপতি ও জাতির পিতা বঙ্গবন্ধু শেখ মুজিবুর রহমান ও তাঁর পরিবারবর্গের সদস্যদের ১৫ আগস্টের নির্মম হত্যাকাণ্ডের ঘটনায় গভীর শোক ও শ্রদ্ধা প্রকাশ করছি।

বিশাল এই গবেষণাগ্রন্থের সমস্ত দিক নিয়ে স্বাভাবিকভাবেই এত সীমিত পরিসরে আলোচনা করা সম্ভব নয়। মৌলিকভাবে গ্রন্থটির সার্বিক বিষয় নিয়ে এক নজরে বলব। তারপর কয়েকটি বিষয় নিয়ে বিস্তারিত বলব এবং এর সঙ্গে আমার নিজস্ব চিন্তার মিল-অমিল নিয়ে কিছু বলব। গ্রন্থটি ১২টি অধ্যায় এবং ৭১৬ পৃষ্ঠার। ২৭৫টি তথ্যপঞ্জি বা রেফারেন্স আছে, যা যেকোনো গবেষণাগ্রন্থের জন্য খুব বড় বিষয়। মুখবন্ধটি অত্যন্ত সুপরিষ্কার ও সুচিন্তিতভাবে লেখা।

প্রথম অধ্যায়ে লেখক তাঁর প্রস্তাবিত শোভন সমাজের ধারণাত্মক তত্ত্বকাঠামো উপস্থাপন করেছেন। তিনি শোভন সমাজ বলতে কী বোঝাতে চান, শোভন সমাজের মৌলিক মতাদর্শগত দিক কী হবে, তার কাঠামো কী হবে—সে বিষয়টি উপস্থাপন করেছেন।

দ্বিতীয় অধ্যায়—‘শোভন সমাজের সন্ধানে: প্রচলিত মূলধারার অর্থনীতিশাস্ত্রের অপারগতা ও নতুন অর্থনীতিশাস্ত্রের যৌক্তিকতা’। এখানে তিনি শোভন সমাজসংশ্লিষ্ট অর্থনীতিশাস্ত্র কেন প্রয়োজন, সেটি আলোচনা করেছেন। প্রচলিত সব ধারার অর্থনীতিশাস্ত্র নিয়ে ব্যাখ্যা-বিশ্লেষণের পর কেন তিনি শোভন সমাজের জন্য নতুন অর্থনীতিশাস্ত্র প্রয়োজন, তা নিয়ে আলোচনা করেছেন।

তৃতীয় অধ্যায়—আমি যেটা মনে করি, শোভন সমাজের মতাদর্শগত ভিত্তি হিসেবে বাংলাদেশের মুক্তিযুদ্ধের চেতনাকে গ্রহণ করেছেন এবং এর জন্য তৃতীয় অধ্যায়ের শিরোনাম—মুক্তিযুদ্ধের চেতনার রাজনৈতিক অর্থনীতি: শোভন জীবনব্যবস্থার ভিত্তি।

চতুর্থ অধ্যায়ের শিরোনাম—ধনী-দরিদ্র শ্রেণিবৈষম্য-অসমতা: শোভন সমাজ বিনির্মাণে প্রধান দুর্ভাবনার বিষয়।

পঞ্চম অধ্যায়—‘সাম্প্রদায়িকতা ও মৌলবাদ: শোভন সমাজের অশোভন প্রতিপক্ষ’। বিশেষ বাস্তবতায় বাংলাদেশের একজন অর্থনীতি ও সমাজবিদ হিসেবে ড. বারকাত তাঁর গবেষণার মৌলিক বিষয় হিসেবে সাম্প্রদায়িকতা ও মৌলবাদ নিয়ে সাম্প্রতিক সময়ে এবং অতীতেও অনেক গ্রন্থ লিখেছেন। তিনি শোভন জীবনের অশোভন প্রতিপক্ষ হিসেবে সাম্প্রদায়িকতা ও মৌলবাদকে চিহ্নিত করেছেন, যা বাংলাদেশের জন্য তাঁর একটি মৌলিক অবদান।

ষষ্ঠ অধ্যায়ের শিরোনাম—‘পাল্টে যাচ্ছে বিশ্বায়ন: শোভন সমাজের লক্ষ্যে বিশ্বায়ন নাকি দেশজায়ন?’। এখানে বিশ্বায়নের যাবতীয় বিষয় বিস্তৃতভাবে আলোচনা করেছেন এবং একই সঙ্গে বিশ্বায়নের এন্টিথিসিস হিসেবে দেশজায়ন, যাকে আমরা ন্যাশনালাইজেশন বলি, তার সম্পর্কটা নির্ধারণ করেছেন এবং আসলে ন্যাশনাল অ্যাসপেক্ট বাদ দিয়ে গ্লোবালাইজেশন হয় কি না, সে প্রশ্নই তিনি তুলেছেন।

সপ্তম অধ্যায়—‘দুর্নীতি-দুর্ভোগের কাঠামোতে অর্থনৈতিক প্রবৃদ্ধি—কেন হচ্ছে, কত দূর হবে?’ আমরা সবসময় বলি যে আমাদের অর্থনৈতিক প্রবৃদ্ধি হচ্ছে, দেশ এগিয়ে যাচ্ছে, আমাদের দেশ অগ্রসর হচ্ছে—এসবের তাত্ত্বিক ও ব্যবহারিক দিক এখানে তিনি বিশদ আলোচনা করেছেন এবং ব্যাখ্যা-বিশ্লেষণ করে দেখিয়েছেন, কেন এই প্রবৃদ্ধি হচ্ছে এবং এটি কত দূর যেতে পারে, যেটা অত্যন্ত গুরুত্বপূর্ণ বিষয়। দেশের বুদ্ধিজীবীসহ বিশ্বব্যাপী অনেকের ধারণা, প্রবৃদ্ধি দিয়ে যে পথে বাংলাদেশ এগোচ্ছে, তাতে সংকট থেকে আমরা পরিত্রাণ পাব। কিন্তু ড. বারকাত এই গ্রন্থে দেখিয়েছেন—এই প্রবৃদ্ধি কত দূর হবে এবং এর সীমাবদ্ধতাই বা কী।

অষ্টম অধ্যায়—‘কভিড-১৯ এর প্রত্যক্ষ ক্ষতির বিশ্লেষণ এবং মোকাবেলা ভাবনা: শোভন সমাজের অভীষ্ট প্রাথমিক কর্মকাণ্ড’। এখানে ড. বারকাত বিশ্বব্যাপী সমাজ-অর্থনীতি-রাষ্ট্রে কভিড-১৯-এর ক্ষতির বিস্তারিত বিশ্লেষণ এবং কীভাবে তা মোকাবেলা করতে হবে এবং শোভন একটি বিশ্বব্যবস্থা গড়ে তোলা যাবে, তা নিয়ে বিস্তৃত আলোচনা করেছেন।

নবম অধ্যায়ে ড. বারকাত ‘কভিড-১৯: পুনরুদ্ধার ও শোভন সমাজ-অর্থনীতি বিনির্মাণ মডেল’ শিরোনামে এখন যে বিশ্ব অর্থনীতিতে মহামন্দা চলছে, তাকে তিনি কভিড-১৯-এর কারণে নয় পুঁজিবাদী অর্থব্যবস্থার

অবশ্যম্ভাবী ফল হিসেবে তুলে ধরে কভিড-১৯-এর ক্ষতির আলোকে ব্যাখ্যা-বিশ্লেষণ করেছেন। এবং এ সংকট থেকে বেরিয়ে আসার জন্য পুঁজিবাদী অর্থব্যবস্থার বিকল্প হিসেবে, যাকে তিনি ‘শোভন সমাজ ও জীবনব্যবস্থা’ হিসেবে উল্লেখ করেছেন এবং সেই ব্যবস্থার ‘অর্থনৈতিক মডেল’ উপস্থাপন করেছেন।

অধ্যাপক ড. আবুল বারকাতের এই গ্রন্থের আমার দৃষ্টিতে অন্যতম গুরুত্বপূর্ণ ও মূল অধ্যায় হলো দশম অধ্যায়—‘সমাজ সমগ্রকের রাজনৈতিক অর্থনীতি: শোভন সমাজ-অর্থনীতির সন্ধানে’। এ প্রসঙ্গে আমি এখন থেকে পাঁচ-ছয় বছর আগে ড. বারকাতের সঙ্গে একটি ব্যক্তিগত আলোচনার প্রসঙ্গে বলব। তাঁকে সে সময় বলেছিলাম, ‘আপনার উচিত বাংলাদেশের আর্থসামাজিক অবস্থার গবেষণালব্ধ একটি বিস্তৃত ব্যাখ্যা-বিশ্লেষণ তুলে ধরা।’ তিনি আমাকে বলেছিলেন, ‘এটা কি আমাকেই করতে হবে?’ আমি বলেছিলাম, ‘হ্যাঁ আপনাকেই করতে হবে।’ আমি আজকে এই প্রসঙ্গে তাঁকে ধন্যবাদ দিই—‘সমাজ সমগ্রকের রাজনৈতিক অর্থনীতি: শোভন সমাজ-অর্থনীতির সন্ধানে’-এর ১৫টি উপ-অধ্যায়ে সেসব বিষয় নিয়ে তিনি বিস্তৃত আলোচনা করেছেন। তাঁর সঙ্গে একমত-দ্বিমতের প্রসঙ্গ যা-ই থাকুক, আমি মনে করি, এটি একটি বাংলাদেশের জন্য একটি গুরুত্বপূর্ণ মৌলিক অবদান এবং বাংলাদেশের রাজনীতি-অর্থনীতি-সমাজ এবং বুদ্ধিবৃত্তির সমস্ত ক্ষেত্র নিয়ে যে তিনি যে মূল্যায়ন করেছেন, তার সুদূরপ্রসারী প্রভাব আছে—তা কাজে দেবে।

একাদশ অধ্যায়—‘ভাইরাসের মহাবিপর্ষয় থেকে শোভন বাংলাদেশ: বিকল্প বাজেট ২০২০-২০২১’। বেশ কয়েক বছর ধরে লক্ষ করছি, বাংলাদেশ সরকারের প্রতিবছর জাতীয় বাজেট উত্থাপনের ঠিক আগেই আগেই অধ্যাপক ড. আবুল বারকাত জাতির কাছে একটি বিকল্প বাজেট পেশ করেন। কোভিড-১৯-এর এই মহাবিপর্ষয়কালে সরকার যে বাজেট ঘোষণা করেছে, তার বিপরীতে বাংলাদেশের বাজেট আসলে কেমন হওয়া উচিত, সেটিও এই গ্রন্থে বিস্তৃতভাবে তিনি উপস্থাপন করেছেন।

ড. বারকাত বলেছেন, তিনি গবেষণাগ্রন্থটি এমনভাবে বিনির্মাণ করেছেন—প্রথমে তিনি একটি তাত্ত্বিক মডেল নির্মাণ করেছেন এবং সত্যিকারভাবে তার অনুশীলন ও ব্যবহারিক দিক কী হওয়া উচিত, আমাদের দেশের বাস্তবতায় কীভাবে তা প্রয়োগ ও অনুশীলন করতে পারি, সে জন্য তিনি বিকল্প বাজেট থেকে শুরু করে সমাজ সমগ্রকের রাজনৈতিক অর্থনীতির সমস্ত বিষয় নিয়ে আলোচনা করে ‘শোভন একটি সমাজ ও অর্থনীতির’ সন্ধান করেছেন। ফলে তাঁর গোটা গবেষণাগ্রন্থের কাঠামো একদিকে যেমন তাত্ত্বিক মডেল এবং সেই সাথে অন্যদিকে আমাদের দেশের বাস্তবতায় সেই মডেল কীভাবে প্রয়োগ করা যাবে তার পথনির্দেশক।

সবশেষে উপসংহারে পৌঁছেছেন এবং বলেছেন, এই মহামারির বিশ্বে পরিবর্তন অনিবার্য। এই পরিবর্তনে আমরা কী চাই। তিনি ভবিষ্যদ্বাণী করেছেন—যে বিশ্ব এখন আছে, মহামারির পরে সেই বিশ্ব আর থাকবে না। আমরা গত শতাব্দীতে দুটি বিশ্বযুদ্ধ দেখেছি। প্রথম বিশ্বযুদ্ধের পরে বিশ্বে যে যুগান্তকারী ঘটনা ঘটেছিল, তার সঙ্গে আমরা একমত বা দ্বিমত হতে পারি। সোভিয়েত সমাজতান্ত্রিক বিপ্লব এবং দ্বিতীয় বিশ্বযুদ্ধের পরে ইউরোপ ও পূর্ব ইউরোপের বিভিন্ন দেশসহ পৃথিবীর বিভিন্ন দেশে সমাজতান্ত্রিক পরিকাঠামো তৈরি হয়েছে এবং বিশ্বব্যাপী সাম্রাজ্যবাদের বিরুদ্ধে জাতীয় মুক্তির লড়াই আমরা দেখেছি। এখন এই ভাইরাসের মহাবিপর্ষয়ের পরে আমার মনে হয়, লেখক এই গ্রন্থে পরিষ্কারভাবেই বলেছেন, গোটা বিশ্ব একটি নতুন পৃথিবী দেখবে এবং নতুন পরিবর্তনের সামনে দাঁড়াবে—এটাই হলো ড. বারকাতের উপসংহার। এক বাক্যে বলা যায়, তাঁর এই গবেষণাগ্রন্থের এটাই হলো মূল নির্যাস।

আমি সব অধ্যায় নিয়ে আলোচনা করব না, সীমিত এই পরিসরে সেটা সম্ভবও না। চারটি অধ্যায় আলোচনা করব এবং অধ্যায়ের সঙ্গে মিলিয়ে আমার মতামত তুলে ধরব।

এই গবেষণাগ্রন্থের মুখবন্ধটি অত্যন্ত গুরুত্বপূর্ণ। আপনারা জানেন, যেকোনো গবেষণাগ্রন্থ তা কার্ল মার্কসের পুঁজি হোক বা অ্যাডাম স্মিথের ওয়েলথ অব নেশনস হোক, যেকোনো গবেষণাগ্রন্থের জন্যই মুখবন্ধ খুব গুরুত্বপূর্ণ। এই গ্রন্থের মুখবন্ধে ড. বারকাত সার্বিকভাবে কতগুলো বিষয় এনেছেন। প্রথম কথা হলো, তিনি মানুষ ও তার সামাজিক কাঠামোর ইতিহাসের কথা বলেছেন এবং আমার মনে হয়, তিনি ঐতিহাসিক বস্তুবাদকে ভিত্তি করেই সেসব কথা বলেছেন। আদিম সাম্যবাদী সমাজ, দাস সমাজ, ফিউডাল সমাজ, পুঁজিবাদী সমাজ—এসব কাঠামোকে তিনি আমার দৃষ্টিতে মার্কসীয় প্যারাডাইমের আলোকে বলেছেন, ঐতিহাসিক বস্তুবাদের আলোকে বলেছেন। প্রথম ও দ্বিতীয় অধ্যায়ে তিনি এসব ঐতিহাসিক বিষয় বস্তুবাদের কাঠামোর আলোকে ব্যাখ্যা করেছেন।

তৃতীয় অধ্যায়ে তিনি ‘শোভন সমাজ ও জীবনব্যবস্থার’ প্রস্তাব করেছেন এবং সেটির মতাদর্শগত যে ভিত্তি, যা মূল বিষয় এই গবেষণাগ্রন্থের, তা-ও ব্যাখ্যা-বিশ্লেষণ করেছেন। বিস্তৃতভাবে তিনি পুঁজিবাদী ব্যবস্থার কাঠামোগত সারসংক্ষেপ এবং তার বিপরীত বা এন্টিথিসিস হিসেবে ‘শোভন জীবনব্যবস্থার’ অপরিহার্যতার কথা বলেছেন এবং তিনি নিজেই ঘোষণা করেছেন—গবেষণার মেথডোলজি হিসেবে তিনি ডায়ালেকটিক মেথড ব্যবহার করেছেন এবং তিনি আরোহ-অবরোহ পদ্ধতি ব্যবহার করেছেন। আমি মনে করি, মূলত তিনি দ্বন্দ্ব-দর্শনব্যবহার করেছেন। যারা মার্কসবাদী স্বাভাবিকভাবেই তাঁরা বলবেন, তিনি দ্বন্দ্বমূলক বস্তুবাদী চিন্তন পদ্ধতি ব্যবহার করেছেন। অর্থাৎ ভাববাদী নয়, বস্তুবাদী দ্বন্দ্ব-দর্শন তিনি ব্যবহার করেছেন। আমি এ নিয়ে নতুন কোনো বিতর্কের কথা বলছি না। কিন্তু আমার মনে হয়েছে, তিনি যে ডায়ালেকটিকস ব্যবহার করেছেন, থিসিস-এন্টিথিসিস-থিনসিসিস ব্যবহার করেছেন যদিও তা ভাববাদী দর্শনেও আছে।

গ্রন্থের মুখবন্ধের ১০ নম্বর পয়েন্টটি খুবই গুরুত্বপূর্ণ, যেখানে তিনি রাষ্ট্র ক্ষমতা দখল ও তার উপায় এবং এই রাষ্ট্রের রূপান্তরের প্রক্রিয়া সম্পর্কে বলেছেন। আমরা জানি যে মার্কসীয় দর্শন বা সমাজবিজ্ঞানের বহু মতবাদে রাষ্ট্র ও রাষ্ট্র ক্ষমতা দখল বিষয়ে অনেক বিতর্ক আছে। ড. বারকাত রাষ্ট্র ক্ষমতা দখলের সব উপায়ের বিশ্লেষণ করেছেন, সেটা সশস্ত্র উপায়, নির্বাচন, অভ্যুত্থান বা অন্য যেকোনো উপায়েই রাষ্ট্র ক্ষমতা দখল হতে পারে বলে তিনি নিজের বক্তব্য রেখেছেন। এ নিয়ে একমত-দ্বিমত হতেই পারে। তবে কেন তিনি বলেছেন, ঐতিহাসিক অভিজ্ঞতার আলোকে সারসংক্ষেপ আকারে তার ব্যাখ্যাও দিয়েছেন। এসবের পরে তিনি ‘শোভন জীবনব্যবস্থার’ কাঠামোগত বিশ্লেষণ উপস্থাপন করেছেন। এসবই এই গ্রন্থের মুখবন্ধের উল্লেখযোগ্য এবং সার্বিক বিষয়।

প্রথম অধ্যায়ের শোভন সমাজের ধারণাত্মক তত্ত্বকাঠামো এবং তাঁর যে প্রস্তাবনা, সে বিষয়ে কিছু বলব। প্রথম অধ্যায়ের ৪ নম্বর পৃষ্ঠার লেখচিত্র ১-এ তিনি ‘শোভন সমাজ’ ধারণার তিনটি বৃহৎবর্গীয় অঙ্গ, অঙ্গসমূহের ভিত্তি-উপাদান ও যোগসূত্র তুলে ধরেছেন:

এই ভিত্তিকঠামোর গুরুত্বপূর্ণ বিষয়, যেগুলো বৃহত্তর আলোচনার দাবি রাখে, তার মধ্যে প্রথমত, ‘মানবকল্যাণ-উদ্দিষ্ট বিজ্ঞান চর্চা’ অর্থাৎ এমন বিধ্বংসী বা এমন কোনো বিজ্ঞান চর্চা হওয়া উচিত না, যা সমাজ-সভ্যতা-পৃথিবীকে ধ্বংস করে। দ্বিতীয়ত, অর্থনৈতিক ভিত্তি-উপাদান-এর বৈষম্যহীন, শোষণমুক্ত, দারিদ্র্যমুক্ত, বঞ্চনামুক্ত অর্থনীতি’ ব্যবস্থার কথা বলেছেন—এগুলোর প্রতিটিই আলোচনার দাবি রাখে। এখানে তিনি বিশ্লেষণ করে দেখিয়েছেন—কেন বৈষম্য সৃষ্টি হয়, কোথায় বৈষম্য হয় এবং কে শোষণ

‘শোভন সমাজ’ ধারণা:
প্রকৃতির বিধি-বিধানের প্রতি পূর্ণ আনুগত্য-অধীনস্থতাভিত্তিক

সামাজিক ভিত্তি-উপাদান	↔	অর্থনৈতিক ভিত্তি-উপাদান	↔	রাজনৈতিক ভিত্তি-উপাদান
আলোকিত মানুষ	↔	বৈষম্যহীন, শোষণমুক্ত, দারিদ্র্যমুক্ত, বঞ্চনামুক্ত অর্থনীতি	↔	শোভন রাষ্ট্র ব্যবস্থা: জনগণের রাষ্ট্র, জনগণের প্রাধান্য
<ul style="list-style-type: none"> ● জ্ঞানসমৃদ্ধ; মুক্তচিন্তা ও সৃজন বিকাশ-উদ্ভিষ্ট ● উচ্চমাত্রা সংহতিবোধসমৃদ্ধ ● অপসংস্কৃতি, কুসংস্কার, কুপমভুক্ততা, অসাম্প্রদায়িকতামুক্ত যুক্তিবাদী মানুষ ● মানবকল্যাণ-উদ্ভিষ্ট বিজ্ঞান চর্চা 	↔	<ul style="list-style-type: none"> ● প্রাকৃতিক সম্পদে জনগণের মালিকানা (ব্যক্তিমালিকানা নয়) ● উৎপাদনের উপায়ের ওপর সামাজিক মালিকানা: জনগণের মালিকানা, রাষ্ট্রের ও যৌথ-সমবায়ী মালিকানা (ব্যক্তিমালিকানা নয়) ● বিলুপ্ত হবে—সব ব্যাংক (কেন্দ্রীয় ব্যাংক ব্যতীত), শেয়ার (পুঁজি) বাজার, মজুরিশ্রম (মেহনতি মানুষ উৎপাদনের উপায়ের ওপর মালিক হেতু), পুঁজিপতি, অশ্রীল ধনী 	↔	<ul style="list-style-type: none"> ● জন-গণের গণতন্ত্র ● প্রভুহীন শাসনব্যবস্থা (জনগণই প্রভু) ● ‘নিচ থেকে উপর’ শাসনব্যবস্থা ● স্থানীয় শাসনব্যবস্থার প্রাধান্য ● গণকল্যাণমুখী ন্যায় বিচার কাঠামো ● প্রথাগত আমলাতন্ত্রের বিলুপ্তি ● কম্যুনিটি প্রশাসনব্যবস্থা ● দেশরক্ষা, প্রতিরক্ষা—জনগণের দায়িত্ব (সমরাজ, যুদ্ধাজ, মারশাজের বিলুপ্তি)

করে, কে শোষক, কে শোষিত—এসব বিষয়। তিনি দেখিয়েছেন, আসলে দারিদ্র্যের উৎস কোথায়, কারণ কী এবং যে অর্থনীতিশাস্ত্র এসব সমস্যা এড়িয়ে চলে সামনের দিকে এগিয়ে যেতে পারে, তাকে তিনি ‘শোভন সমাজের অর্থনীতিশাস্ত্র’ হিসেবে অভিহিত করেছেন। এখানে তিনি একটি মৌলিক বিষয় অন্তর্ভুক্ত করেছেন, সেটি হচ্ছে প্রাকৃতিক সম্পদে জনগণের মালিকানা। ব্যক্তিমালিকানা নয়, সামাজিক মালিকানা; যেখানে উৎপাদনের উপায়ের ওপর সামাজিক মালিকানা: জনগণের মালিকানা, রাষ্ট্রের ও যৌথ-সমবায়ী মালিকানা থাকবে। এখানে অত্যন্ত গুরুত্বপূর্ণ একটি বিষয় ড. বারকাত উল্লেখ করেছেন, যিনি ব্যাংকিং সিস্টেমেরও একজন বিশেষজ্ঞ। তিনি বলছেন, কেন্দ্রীয় ব্যাংক ব্যতীত সকল ব্যাংক বিলুপ্ত হবে। অর্থাৎ তিনি মনে করেন, আমাদের দেশ, বা পুঁজিবাদী সমাজের মৌলিক শোষণের অন্যতম ক্ষেত্রটা হচ্ছে ব্যাংকিং ব্যবস্থা বা ফাইন্যান্সিয়ালাইজেশন সিস্টেম। অতএব এই ব্যাংকিং ব্যবস্থা যদি জনগণের হাতে না থাকে, জনগণের অধিকারের মধ্যে না থাকে—তাহলে তা সমাজে বৈষম্য-শোষণ-বঞ্চনার সৃষ্টি করতেই থাকবে। তৃতীয় ভিত্তি উপাদানে তিনি ‘শোভন রাষ্ট্র’-এর কথা বলেছেন। এই ‘শোভন রাষ্ট্র’ বলতে তিনি বুঝিয়েছেন—জনগণের রাষ্ট্র, যেখানে জনগণের প্রাধান্যই মূল কথা। রাষ্ট্র নিয়ে বুদ্ধিজীবী, রাজনৈতিক কর্মী-নেতৃত্ব এবং সামাজিক বিজ্ঞানীদের মধ্যে ব্যাপক-বিস্তৃত বিতর্ক আছে। ড. বারকাত বলছেন, জনগণের রাষ্ট্র, যেখানে সর্বত্র জনগণের প্রাধান্য থাকবে, জনগণের গণতন্ত্র থাকবে, আমরা পিপলস ডেমোক্রেসি বলতে যা বুঝি। এটি মার্কসীয় পরিকাঠামো নিয়ে যারা কাজ করেন, তাঁরাও পিপলস ডেমোক্রেসির কথা বলেন। ড. বারকাত এসব পরিকাঠামোর সঙ্গে তাঁর প্রস্তাবিত ব্যবস্থার পার্থক্য কী, সেটা ব্যাখ্যা করেছেন এবং তিনি নতুন ধরনের নাগরিক শাসনের কথা বলেছেন, যেটা ‘নিচ থেকে উপরে’ অর্থাৎ ‘উপর থেকে নিচে নয়’, যেখানে প্রথাগত আমলাতন্ত্র, যা এখনকার রাষ্ট্রব্যবস্থায় রয়েছে, তা থাকবে না। কীভাবে থাকবে না, কেন থাকবে না সেসবও তিনি বিস্তারিত ব্যাখ্যা-বিশ্লেষণ করেছেন। আরেকটি গুরুত্বপূর্ণ বিষয় তিনি বলেছেন—দেশরক্ষা, প্রতিরক্ষা—জনগণের দায়িত্ব। এটি নিয়ে বড় ধরনের আলোচনা হতে পারে।

ড. বারকাত শোভন যে সমাজের কথা বলছেন, সেখানে একটি শোভন রাষ্ট্র থাকবে। আমরা যারা মার্কসবাদী কর্মী বা যারা সমাজ বিপ্লবের কথা বলি, আমরা যাকে কমিউনিস্ট সোসাইটি বা সাম্যবাদী সমাজ বলি, যেখানে মার্কস-এঙ্গেলসের ভাষায় 'রাষ্ট্রের বিলুপ্তি' অর্থাৎ রাষ্ট্র শুকিয়ে যাবে, রাষ্ট্র থাকবে না। কিন্তু অধ্যাপক আবুল বারকাত বলছেন, 'শোভন সমাজে' একটি বিস্তৃত কাল ধরে রাষ্ট্র থাকবে অর্থাৎ রাষ্ট্রের অস্তিত্ব তিনি স্বীকার করেছেন। ফলে এখানে যারা পুঁজিবাদের বিকল্প হিসেবে, সমাজতন্ত্রের কথা বলেন এবং সমাজতন্ত্রে একটা বিস্তৃত সময় ধরে একটা রাষ্ট্র থাকবে। শুধু সাম্যবাদী সমাজে রাষ্ট্র শুকিয়ে মরবে বা বিলুপ্ত হবে, যা মার্কসীয় পরিকাঠামোর বলা আছে। ড. বারকাত এটির সঙ্গে তাঁর মতাদর্শের পার্থক্যের কথা বলেছেন। তিনি অবশ্য সাম্যবাদী সমাজের সঙ্গে তাঁর প্রস্তাবিত শোভন সমাজের কিছু মিলের কথা বলেছেন। কিন্তু সাম্যবাদী সমাজে যাওয়ার পরে যে কোনো রাষ্ট্রব্যবস্থাই থাকতে পারে না, সে বিষয়ে সুস্পষ্ট করে কিছু বলেননি—এমনটাই আমার মনে হয়েছে।

দ্বিতীয় অধ্যায়ে, যেখানে তিনি শোভন সমাজের সন্ধান করতে গিয়ে প্রচলিত মূলধারার অর্থনীতিশাস্ত্রের অপারগতা ও নতুন অর্থনীতিশাস্ত্রের যৌক্তিকতা তুলে ধরে শোভন সমাজের অর্থনৈতিক ভিত্তি কেমন হতে পারে, সেটা বলেছেন। এখানে তিনি প্রচলিত অর্থনীতিশাস্ত্রকে দুটি ভাগে ভাগ করেছেন। একটিকে মূলধারার অর্থনীতিশাস্ত্র বলেছেন, অন্যটিকে তিনি কোভিড-১৯ এবং বৈশ্বিক এই সংকটের বাস্তবতা থেকে উত্তরণের জন্য নতুন অর্থনীতিশাস্ত্রীয় ধারা বলেছেন। এখানে তিনি মূলধারার অর্থনীতিশাস্ত্রের মধ্যে মার্কসীয় অর্থনীতিশাস্ত্রকে রেখেছেন। আমার দৃষ্টিতে আমি তাঁর এই বিভাজনের সঙ্গে একমত নই। কারণ, তিনি নিজেই বলেছেন, মার্কসীয় অর্থনীতিশাস্ত্রকে এখন মূলধারার অর্থনীতিশাস্ত্র বলতে যা বোঝায়, যার দুটি ধারা আছে—একটি ধারা সার্বিকভাবে পুঁজিবাদী অর্থনীতিকে গ্রহণ করেছে, আর অন্যটি পুঁজিবাদী অর্থনীতিশাস্ত্রের পরিকাঠামো কিছুটা পরিবর্তন নতুন অর্থনীতি বলছে। কিন্তু পুঁজিবাদী অর্থনীতিশাস্ত্রের বিকল্প হিসেবে যেসব অর্থনীতিশাস্ত্র রয়েছে, তার মধ্যে প্রধান ধারা হচ্ছে, মার্কসীয় অর্থনীতিশাস্ত্র—এটা অস্বীকার করার কিছু নেই; ড. বারকাত এটা বলেছেন মার্কসীয় অর্থনীতিশাস্ত্রের ব্যাখ্যা করে। তাঁর এ কথার যুক্তি আছে—কোভিড-১৯ এবং বৈশ্বিক অর্থনৈতিক মহামন্দা মার্কসীয় অর্থনীতিশাস্ত্র দিয়ে মোকাবিলা করা যাবে না। আর এই অর্থেই তিনি মার্কসীয় অর্থনীতিশাস্ত্রকে মূলধারার অর্থনীতিশাস্ত্রের সঙ্গে সম্পৃক্ত করেছেন। এ বিষয়ে আমার দ্বিমত আছে।

আমি আগেই বলেছি যে, এই গ্রন্থের দশম অধ্যায়ে সমাজ সমগ্রকের বিস্তৃত ব্যাখ্যা-বিশ্লেষণ তিনি করেছেন, তা সংক্ষিপ্ত আলোচনায় আনা সম্ভব না। সে কারণে আমি উপসংহারে আসি। তিনি উপসংহারে কতগুলো কথা বলেছেন। তিনি বলেছেন, বিশ্ব অর্থনীতি নিয়তপরিবর্তনশীল—সত্য কথা। তিনি বলেছেন, ইতিহাস হামাগুড়ি দেয় না, লাফিয়ে চলে। তিনি বিশ্ব ধ্বংসের চারটি উপাদানের কথাও বলেছেন।

আমার দৃষ্টিতে, ড. আবুল বারকাতের এই গবেষণাগ্রন্থটির যেসব বিষয় চিন্তা উদ্রেককারী বা চিন্তার খোরাক জোগায়, তা হলো—সমাজব্যবস্থার ঐতিহাসিক ক্রমবিকাশের যে চিত্র তিনি তুলে ধরেছেন, আমার কাছে সেটাকে মনে হয়েছে অত্যন্ত সমৃদ্ধ। আরেকটি গুরুত্বপূর্ণ বিষয় হচ্ছে, পুঁজিবাদের নির্বিশেষ স্বরূপ উন্মোচন করেছেন। অর্থাৎ পুঁজিবাদী ব্যবস্থার যত ধরনের আবেদন আছে, সেসবের তিনি পুঙ্খানুপুঙ্খ বিশ্লেষণ করে দেখিয়েছেন যে এই পুঁজিবাদী ব্যবস্থা সংকটগ্রস্ত এই সমাজকে সামনে এগিয়ে নিতে পারবে না। তিনি বাংলাদেশের আর্থসামাজিক অবস্থার একটা নির্মোহ বিশ্লেষণ করেছেন, বিশেষ করে কৃষি এবং শিল্পের বিষয়ে বিস্তৃত আলোচনা করেছেন গবেষণালব্ধ জ্ঞান দিয়ে, যা আমাদের সবাইকে সাহায্য করবে।

এবং সবশেষে তিনি পুঁজিবাদের বিকল্প অন্বেষণ করে, নতুন পথের সন্ধান দিয়েছেন। এই চারটি দিক আমার মনে হয় এই গ্রন্থের সবচেয়ে ইতিবাচক দিক, যা আমাদের মধ্যে চিন্তার উদ্রেক করে।

এখন আমি কয়েকটি গ্রন্থের রেফারেন্স উল্লেখ করব। অ্যাডাম স্মিথের *ওয়েলথ অব নেশনস*, কার্ল মার্কসের *দ্য কমিউনিস্ট ম্যানিফেস্টো*, যোশেফ সুমপিটারের *ক্যাপিটালিজম সোসালিজম অ্যান্ড ডেমোক্রেসি*, ফুকুয়ামার *দ্য এন্ড অব হিস্ট্রি অ্যান্ড দ্য লাস্ট ম্যান*, জিওভান্নি আরাহির *দ্য লং টোয়েন্টিথ সেঞ্চুরি* এবং টমাস পিকিটের *দ্য ক্যাপিটাল ইন দ্য টোয়েন্টি ফার্স্ট সেঞ্চুরি*। এই গ্রন্থগুলো খুব প্রাসঙ্গিক, যার মধ্যে সম্ভবত চারটি গ্রন্থের রেফারেন্স অধ্যাপক আবুল বারকাত তাঁর গবেষণাগ্রন্থে উল্লেখ করেছেন। আমি এগুলোর নাম এ জন্য উল্লেখ করেছি যে, এর প্রতিটি গ্রন্থই একেবারে বিশেষ বিশেষ পর্যায়ে রচিত। এর মধ্যে একটি কথা গবেষক অধ্যাপক আবুল বারকাত, যেটি সোভিয়েত ইউনিয়নের বিলুপ্তির পরে বিখ্যাত বলি আর কুখ্যাত বলি ফুকুয়ামার লেখা *দ্য এন্ড অব হিস্ট্রি অ্যান্ড দ্য লাস্ট ম্যান* গ্রন্থটির উল্লেখ এই গবেষণাগ্রন্থে করেছেন। কিন্তু একটা বিষয় শ্রোতাদের উদ্দেশ্যে বলতে চাই—এই ফুকুয়ামা ২০১৮ সালে 'রিসারজেন্স অব সোসালিজম ইন দ্য ইউএসএ' প্রসঙ্গে নিউ স্টেটসম্যান-এ একটি বক্তব্য রেখেছেন, যেটি আমি উদ্ধৃত করছি:

“At this juncture, it seems to me that certain things Karl Marx said are turning to be true. He talked about the crisis of over production... That workers would be impoverished and there would be insufficient demand” (*Resurgence of Socialism in the USA, Y F Fukuyama, New Statesman, 2018*)

অর্থাৎ যে ব্যক্তি ২৬ বছর আগে বলেছেন, *দ্য এন্ড অব হিস্ট্রি অ্যান্ড দ্য লাস্ট ম্যান*, জানি না তার বোধদয় কী—কিন্তু তিনি পুঁজিবাদের এই যে সংকট, তার জন্য আবার কার্ল মার্কসের দ্বারস্থ হয়েছেন। কথাটা বলা দরকার কারণ, আমাদের দেশের এই প্রজন্মের অনেক তরুণ, যারা ফুকুয়ামার অনেক তত্ত্বে প্রভাবিত হন। কিন্তু তার শেষ বক্তব্য পুঁজিবাদের বিকল্প সে মার্কসই হোক বা অন্য যেকোনো মতবাদই হোক, তাদের যে আসতে হবে, সে বিষয়টি তিনি স্বীকার করতে বাধ্য হয়েছেন।

প্রশ্নোত্তর পর্ব

শ্রোতা-দর্শকদের প্রশ্ন এবং অধ্যাপক সুশান্ত কুমার দাস-এর উত্তর

আমি শ্রোতাদের প্রশ্নের উত্তর দেওয়ার আগে আমার কয়েকটি প্রশ্ন করতে চাই। কারণ এর মাধ্যমে শ্রোতাদের অনেকের প্রশ্নের উত্তর হয়েও যেতে পারে।

প্রথমত, এই শোভন সমাজ ধারণাটি নতুন কি না? আপনারা হয়তো জানেন ১৯৯৮ সালের দিকে ইসরাইলের একজন অধ্যাপক অভিসাই মার্গালিট *দ্য ডিসেন্ট সোসাইটি* শিরোনামে একটি গ্রন্থ লিখেছিলেন। ফলে ডিসেন্ট সোসাইটির এই ধারণাটা আক্ষরিক অর্থে একেবারে নতুন না। তবে অধ্যাপক মার্গালিট ডিসেন্ট সোসাইটিকে যেভাবে ব্যাখ্যা করেছেন, আর অধ্যাপক আবুল বারকাত যেভাবে ব্যাখ্যা করেছেন—দুটির মধ্যে অনেক পার্থক্য আছে। এ ধরনের অনেক প্রশ্নের উত্তর অধ্যাপক বারকাত তাঁর গ্রন্থে দিয়েছেন।

● শোভন সমাজ বনাম সাম্যবাদ বা সমাজতন্ত্র

অধ্যাপক বারকাত এই গ্রন্থে নিজেই বলেছেন যে, সমাজতান্ত্রিক ব্যবস্থা, যা এসেছে পুঁজিবাদী ব্যবস্থার এন্টিথিসিস বা বিকল্প হিসেবে। সমাজতান্ত্রিক যে ব্যবস্থার কথা এসেছে, সেখানে শোভন সমাজও এসেছে পুঁজিবাদী ব্যবস্থার বিকল্প হিসেবে। অনেক বিষয় আছে, যা লেখক নিজেও বলেছেন, এমনকি সমাজতান্ত্রিক ব্যবস্থার যেসব মডেল আছে, তার সঙ্গে তিনি দ্বিমত প্রকাশ করেছেন। কিন্তু সাম্যবাদী সমাজের যে ধারণা মার্কস দিয়েছেন, সেসবের সঙ্গে অনেক বিষয়ে তিনি একমত প্রকাশ করেছেন। তবে সেই সমাজ অর্জনের জন্য ড. বারকাত তাঁর নিজস্ব চিন্তার কথা বলেছেন—যা মার্কসের জীবদ্দশায় বা মার্কসীয় য়ারা, তাঁরা অনেক জায়গায় তাঁদের মতো করে বলেছেন।

● শোভন সমাজব্যবস্থা ও ইউটোপিয়া

গ্রন্থকার বলেছেন, ধারণার দিক দিয়ে এটি ইউটোপিয়া। কারণ যদি বাস্তবে অর্জন করা না যায়, তাহলে ইউটোপিয়া। তবে বহু ইউটোপিয়ার মাধ্যমে পরবর্তী সময়ে বৈজ্ঞানিক সমাজতন্ত্রের জন্ম হয়েছে।

● শোভন সমাজব্যবস্থা ও সমাজতন্ত্রে রাষ্ট্রের ভূমিকা

সমাজতান্ত্রিক বিপ্লবের পরে শ্রমিক শ্রেণি যদি রাষ্ট্রক্ষমতা দখল করে বা পুঁজিবাদের বিকল্প হিসেবে যদি শ্রমিক শ্রেণি রাষ্ট্রক্ষমতা দখল করে, তাহলে রাষ্ট্রের ভূমিকা কী হবে। এ সম্পর্কে মার্কসের ধারণা, যা তিনি 'গোথা কর্মসূচির সমালোচনা প্রসঙ্গে বলেছেন, 'ডিক্টেটরশিপ অব প্রলেতারিয়েট'-এর কথা। অর্থাৎ সাম্যবাদে পৌঁছানোর আগে পর্যন্ত একটা রাষ্ট্র থাকবে, যে রাষ্ট্র পুঁজিবাদের যে শোষণ তার বিরুদ্ধে কাজ করবে। কিন্তু শ্রমজীবী মানুষ বা যারা উৎপাদক শ্রেণি—তাদের পক্ষে কাজ করবে। এটাই হলো সমাজতান্ত্রিক রাষ্ট্রের একটা ঐতিহাসিক পর্যায়কাল। মার্কস তাঁর *দ্য ক্লাস স্ট্রাগলস ইন ফ্রান্স*-এর মধ্যেও বলেছেন, *ত্রিটিক অব দ্যা গোথা প্রোগ্রাম*-এর মধ্যেও বলেছেন।

এই গ্রন্থে অধ্যাপক বারকাত শোভন রাষ্ট্রের যে কথা বলেছেন, শোভন রাষ্ট্রের যে বৈশিষ্ট্যগুলোর কথা তিনি বলেছেন, তা অর্জনের দিক দিয়ে মার্কসীয় কাঠামোয় যেসব মডেল আছে, তার সঙ্গে হয়তো পার্থক্য আছে। কিন্তু ধারণার দিক দিয়ে সমাজতান্ত্রিক ধারণা থেকে একেবারে বিপরীত—সেটি আমার মনে হয়নি। অর্থাৎ সমাজতান্ত্রিক ধারণা-কাঠামোর মধ্যেই তিনি অবস্থান করেছেন, পুঁজিবাদের বিকল্পের সন্ধান দিয়েছেন।

● পুঁজিবাদ থেকে উত্তরণ ও শোভন সমাজ ধারণা

এই গ্রন্থে অধ্যাপক নোয়াম চমস্কির কথা এসেছে, যাঁর একটি নিজস্ব চিন্তা আছে। তাঁর মতবাদকে বলা হয়, 'অ্যানার্কো সিভিক্যালিজম' সেখানে তিনি রাষ্ট্রকে উপেক্ষা করেছেন। মার্কসীয় চিন্তার সঙ্গে তাঁর পার্থক্য থাকতে পারে।

পুঁজিবাদ থেকে সাম্যবাদে উত্তরণের বহু পথ আছে। তার মধ্যে মার্কসীয় পরিকাঠামোটি একটি প্রধান ধারা। এ ছাড়া অন্য ধারণা নেই, এমনটা মনে করার কোনো কারণ নেই এবং পৃথিবীতে তার ব্যবহারিক প্রয়োগেরও অনেক জায়গা আছে। ফলে এখন সময় এসেছে; আমাদের এসব বিষয় নিয়ে খুব গভীরভাবে চিন্তাভাবনা করা দরকার। মার্কসবাদের একটা বৈশিষ্ট্য হলো, সুনির্দিষ্ট বাস্তবে সুনির্দিষ্ট সিদ্ধান্ত নেওয়া। ফলে শোভন সমাজের যে ধারণার কথা বলা হচ্ছে, সেই ধারণা পুঁজিবাদের একটা বিকল্প হিসেবে আসতেই পারে। তবে সাদৃশ্য-বৈসাদৃশ্য বিষয়গুলো এখানে থাকতে হবে।

● সমাজতান্ত্রিক মডেল ও স্টেট ক্যাপিটালিজম

ড. বারকাত তাঁর গ্রন্থে অনেক মডেলের ব্যাখ্যা-বিশ্লেষণ করেছেন যেমন সোভিয়েত মডেল, পূর্ব ইউরোপীয় মডেল, ল্যাটিন আমেরিকান মডেল প্রভৃতি। কোনো কোনো জায়গায় এসব মডেলের শর্টকামিং সত্ত্বেও এদের সমাজতান্ত্রিক দেশ হিসেবে অভিহিত করেছেন। কিন্তু সোভিয়েত রাষ্ট্রকে তিনি বলেছেন স্টেট ক্যাপিটালিজম। তিনি বলেছেন, সোভিয়েত ইউনিয়নের ৭০ বছরের ইতিহাসে এই স্টেট ক্যাপিটালিজম একরকম ছিল না। আমি ব্যক্তিগতভাবে এই স্টেট ক্যাপিটালিজম বলাটা সঠিক বলে মনে করি না। সোস্যালিজম থাকবে আবার স্টেট থাকবে, সে ব্যাপারে অনেকের দ্বিমত আছে। কিন্তু একটি বিষয় পরিষ্কার—সাম্যবাদে পৌঁছানোর আগে পর্যন্ত একটা দীর্ঘ ঐতিহাসিক কাল ধরে একটি রাষ্ট্র থাকবে, যেটা জনগণের রাষ্ট্র হবে, উৎপাদক শ্রেণির স্বার্থ রক্ষা করবে। নিশ্চয়ই শোষণক শ্রেণির স্বার্থ রক্ষা করবে না। ফলে সমাজতন্ত্রের এই বিষয়টি, সে শোভন রাষ্ট্র বা সমাজতান্ত্রিক রাষ্ট্রই হোক—একটা ঐতিহাসিক কালজুড়ে তাকে শোষণক শ্রেণির বিরুদ্ধে ডিস্ট্রিটরশিপ প্রয়োগ করতেই হবে।

● শোভন রাষ্ট্রে রূপান্তর

গ্রন্থে ড. বারকাত বলেছেন, রাষ্ট্রে রূপান্তর প্রয়োজন। অর্থাৎ রাষ্ট্র শুধু ক্ষমতা দখল করলেই হবে না। শোভন রাষ্ট্রে রূপান্তরের প্রয়োজন হবে এবং জনগণের জন্য অধিকতর গণতন্ত্রে রূপান্তর না হলে, সেই রাষ্ট্র আমলাতান্ত্রিক রাষ্ট্রে পরিণত হতে পারে। ইতিহাসে সে অভিজ্ঞতাও আমাদের আছে।

● অর্থনীতির শ্রেণি বিভাজন প্রসঙ্গে

আমি মনে করি, অর্থনীতিশাস্ত্রের দুটি ভাগ হওয়া উচিত। একটি পুঁজিবাদ রক্ষাকারী অর্থনীতিশাস্ত্র। অন্যটি পুঁজিবাদের বিকল্প অর্থনীতিশাস্ত্র এবং এর পরিকাঠামো কী হতে পারে, সেই অর্থনীতিশাস্ত্র। সেখানে মার্কসীয় অর্থনীতিশাস্ত্র থেকে শুরু করে ড. বারকাত যে শোভন অর্থনীতিশাস্ত্র প্রস্তাব করেছেন, কোভিড অর্থনীতিশাস্ত্রের কথা বলেছেন—সেসবও থাকবে। এদের মধ্যে পার্থক্য থাকতে পারে, কিন্তু সার্বিকভাবে এরা পুঁজিবাদের বিকল্প।

● শোভন সমাজ ও মার্কসবাদের মধ্যে সাদৃশ্য-বৈসাদৃশ্য

মার্কসবাদের একটি নির্দিষ্ট পরিকাঠামো আছে। মার্কসবাদ মতবাদটাই হলো এমন যে, পরিবর্তিত পরিস্থিতির সঙ্গে সঙ্গে সেই পরিবর্তিত পরিস্থিতি ব্যাখ্যা করার মৌলিক দৃষ্টিভঙ্গি, দ্বন্দ্বিক দৃষ্টিভঙ্গি—এটাই মার্কসবাদের মূল কথা।

অধ্যাপক বারকাতকে আমি ধন্যবাদ দেব যে, তিনি তাঁর শোভন মতবাদকেও স্ট্যাটিক বলেননি, ডায়নামিক বলেছেন। অর্থাৎ পরিবর্তিত পরিস্থিতির সঙ্গে সঙ্গে এটি পরিবর্তিত হবে, আরও পরিণীলত হবে। মার্কসবাদের সঙ্গে এখানে সাযুজ্য রয়েছে বলে আমি মনে করি। আমি অধ্যাপক বারকাতকে মার্কসবাদে বিশ্বাসীদের অনেক বড় বন্ধু বলে মনে করি। তাঁর নিজস্ব কোনো চিন্তা-ধারণা থাকতেই পারে, বৈপরীত্য থাকতে পারে, দৃষ্টিভঙ্গির পার্থক্যও থাকতে পারে। কিন্তু তাঁর চিন্তাকে আমি গ্রহণ করব এই জায়গা থেকে যে, তিনি পুঁজিবাদের বিশদ ব্যাখ্যা-বিশ্লেষণ করে বিকল্প হিসেবে একটি ‘শোভন সমাজ ও জীবনব্যবস্থা’র ধারণা প্রস্তাব করেছেন।

পুঁজিবাদের বিকল্প হিসেবে অধ্যাপক বারকাত যে কথাগুলো বলছেন, একজন মার্কসিস্ট অ্যাক্টিভিস্ট হিসেবে আমি মনে করি—তঁার প্রতিটি বিষয়, প্রতিটি প্রস্তাবনা আমি অত্যন্ত গভীরভাবে অনুধাবন করব, যাতে তা সমাজ পরিবর্তনের এই জায়গা থেকে আমি সামনে থেকে এগিয়ে নিতে পারি।

বিপ্লব অর্থই নতুন একটি রাষ্ট্রকাঠামো। আমরা যে প্রস্তাবই করি না কেন, শোভন সমাজের যে প্রস্তাব ড. বারকাত করেছেন, তা এখন যে ডোমিনেটিং পুঁজিবাদী রাষ্ট্রকাঠামো আমাদের দেশে বা বিশ্বে চলছে, সেখানে কোনোভাবেই অর্জন সম্ভব নয়। এই অবস্থায় শোভন কোনো কিছু অর্জিত হবে—এটা মনে করার কোনো কারণই নেই। শোভন বা সাম্যবাদী যে ধারণাই হোক, তা শোষণনিয়ন্ত্রিত এই কাঠামোয় অর্জন সম্ভব নয়।

● শোভন রাষ্ট্র অর্জন

শোভন রাষ্ট্র অর্জন করতে হলে রাজনৈতিক লড়াইয়ের মাধ্যমে তা অর্জন করতে হবে। নতুন একটি রাষ্ট্র কাঠামো প্রতিষ্ঠার জন্য একটি রাজনৈতিক দল প্রয়োজন। অধ্যাপক বারকাত এই গ্রন্থের কোনো জায়গায় এমন কোনো রাজনৈতিক দলের কথা উল্লেখ করেননি। সেই দল কার স্বার্থ রক্ষা করবে? আমি চাইব, তিনি সেই রাজনৈতিক দলের কথা বলবেন, যে দলটি এই রাজনীতি করবে, যারা পরবর্তী সময়ে শোভন রাষ্ট্র কাঠামো তৈরি করবে।

● বঙ্গবন্ধুর হত্যাকাণ্ড ও নিও লিবারেল পলিসি

এই গ্রন্থে উল্লেখ করা এ বিষয়টি সত্য। আমাদের দেশে যারা ট্রনি ক্যাপিটালিজম করেন, তাদের ষড়যন্ত্রের পরিপ্রেক্ষিতে বঙ্গবন্ধুকে হত্যা করা হয়েছে। তঁার হত্যাকাণ্ডের মাধ্যমে শুধু ব্যক্তি বা গোষ্ঠী না, একটি মতাদর্শকে হত্যা করা হয়েছে। এদের বিরুদ্ধেও লড়াই অব্যাহত রাখতে হবে। শুধু কয়েকজনের বিচার করলেই হবে না। যারা বঙ্গবন্ধুর মতাদর্শের বিরুদ্ধে লড়াই করেছে, তাদেরও বিচার করতে হবে। এদের বিরুদ্ধে লড়াই তা শোভন বলি কিংবা সাম্যবাদী বা অন্য যেকোনো মতাদর্শই বলি, তারই অংশ।

● দাম বাড়া ‘গরিবের শত্রু’ আর দাম কমা ‘গরিবের মহাশত্রু’

আমি মনে করি, অধ্যাপক বারকাত দাম বাড়া আর দাম কমা নিয়ে যা বলেছেন, তা অত্যন্ত কুশলতার সঙ্গে রাজনৈতিক-অর্থনৈতিক-সামাজিক-ঐতিহাসিক দৃষ্টিভঙ্গি থেকেই বলেছেন। আমি তাঁকে এ বিষয়ে পুরোপুরি সমর্থন করি। এই সংকটের সময় দরিদ্র মানুষের পক্ষে এই দাম বাড়া কমানোর সঙ্গে কোনোভাবেই ব্যালাস করা সম্ভব না। এর জন্য নতুন একটি রাষ্ট্রব্যবস্থার প্রয়োজন।

● সংসদে যাওয়া না-যাওয়া

আমাদের রাজনৈতিক জায়গা থেকে বলি, এটা একটি রাজনৈতিক লড়াই। আমাদের দেশের সংসদীয় নির্বাচনের ইতিবাচক-নেতিবাচক বহু আলোচনা আমরা করেছি। নেতিবাচক অবস্থার দায় আমাদেরও যে বহন করতে হয় না, তা না। কিন্তু এর অর্থ এই না যে আমরা তা গ্রহণ বা সমর্থন করি। এখন যারা ক্ষমতায় আছে গণতন্ত্রের নামে, তারা যদি এই জায়গা থেকে সরে না দাঁড়ায় তাহলে ইতিহাস তাদের ক্ষমা করবে না।

পরিশেষে বলব, পুঁজিবাদী সমাজব্যবস্থার বিপক্ষে নতুন সমাজব্যবস্থা গড়ে তোলার লড়াইয়ে অধ্যাপক বারকাতকে আমি অত্যন্ত ঘনিষ্ঠ সহযোগী বলে মনে করি।

যারা পুঁজিবাদকে শেষ কথা বলে মনে করেন, অসাধারণ এই গ্রন্থ—“বড় পর্দায় সমাজ-অর্থনীতি-রাষ্ট্র: ভাইরাসের মহাবিপর্ষয় থেকে শোভন বাংলাদেশের সন্ধানে”—তাদের ভালো লাগবে না। পরিষ্কারভাবেই বলি, অনেক ক্ষেত্রে এই গ্রন্থটি তাঁদের রাতের ঘুম কেড়ে নেবে। এই গ্রন্থ সার্বিকভাবে সকল ধরনের পুঁজিবাদের মুখোশ উন্মোচন করেছে এবং তাকে প্রত্যাখ্যান করেছে।

যারা পুঁজিবাদের বিকল্প ভাবেন, তাদের এই বইয়ের বিষয়বস্তু এবং বক্তব্যকে অনুধাবন করতে হবে গভীরভাবে— নিজেদের প্রয়োজনে, তাতে একমত বা দ্বিমত যা-ই হোন না কেন।

সাধারণভাবে যে-কেউ প্রশ্ন করতে পারেন—প্রফেসর আবুল বারকাতের গ্রন্থটি সমাজতন্ত্রের পক্ষে না বিপক্ষে? উত্তর হবে—

১) পুঁজিবাদের পক্ষের লোকেরা, যাঁরা সমাজতন্ত্রের ঘোর বিরোধী, তাঁরা বলবেন—‘সমাজতন্ত্রের বিরুদ্ধে’, কারণ, তিনি ‘শোভন সমাজ’-এর কথা বলেছেন, সমাজতন্ত্রের নয়। কিন্তু তিনি যে পুঁজিবাদের বিরুদ্ধে বলেছেন—এটা বলবেন না।

২) সমাজতন্ত্রের পক্ষে যাঁরা, তাঁরা বলবেন ‘তিনি সমাজতন্ত্রের পক্ষে বলেননি’। তার মানে, তিনি সমাজতন্ত্রের পক্ষে নন। কিন্তু তিনি যে পুঁজিবাদের বিকল্পের কথা বলেছেন, তা আমলেই নেবেন না হয়তো। দুরাত্মার ছলের অভাব নেই—সতর্কতা এখানেই। কোনো গ্রন্থের ‘মলাট’ দেখে গ্রন্থটির বিচার করা ঠিক নয়—ভেতরে কী আছে সেটাই দেখতে হবে। ধন্যবাদ।